

Høyring av verneplan for skog

**Forslag til utviding av Heddedalane naturreservat
i Tokke kommune, Vestfold og Telemark fylke**



Rik furuskog i liene nord og nordvest for Ivarflaten.

Foto: Terje Blindheim, BioFokus

Statsforvaltaren i Vestfold og Telemark

Februar 2021

Innhald

side

1. Bakgrunn.....	3
2. Om verneplanarbeidet og frivillig vern.....	3
3. Heimelsgrunnlag.....	3
4. Saksgang.....	4
5. Verneplanen sitt omfang.....	7
6. Faktaark	8
7. Forslag til verneforskrift	10

Vedlegg: Vernekart

1. Bakgrunn

Statsforvaltaren i Vestfold og Telemark sender med dette på høyring forslag om utviding av Heddedalane naturreservat i Tokke kommune. Området grenser inn mot eksisterande Heddedalane naturreservat i Tokke kommune og vil såleis føre til ei utviding av dette området.

Bakgrunnen for verneforslaget er eit tilbod om frivillig vern frå ein grunneigar den 4.3.2020. Det ble gjort registreringar av naturverdiane i området i 2015 og det er dokumentert verdiar som kvalifiserer for vern etter naturmangfoldloven. Jf. kapittel 6. med nærare skildring av området.

Forhandlinga om erstatning og avtale om pris på området vil bli slutført parallelt med høyringa.

2. Om verneplanarbeidet og frivillig vern.

Meld. St. 14 (2015 – 2016) *Natur for livet* legg opp til ei vidareføring av det langsiktige arbeidet med skogvern, mellom anna auka frivillig skogvern. Under handsaminga av meldinga bad Stortinget regjeringa sette mål om vern av både offentleg eigd skog og frivillig vern av privateigd skog til 10 % av skogarealet i landet. Naturfaglege evalueringar som ligg til grunn for prioriteringane i skogvernarbeidet er «*Evaluering av skogvernet i Norge*», NINA rapport 54/2002 og «*Naturfaglig evaluering av norske verneområder*», NINA rapport 535/2010.

Ved frivillig skogvern gir grunneigarane Statsforvaltaren tilbod om vern av aktuelle område. Det blir gjort naturfaglege registreringar og utarbeidd skogtakster for dei områda der det trengst. På grunnlag av tilbod og dei naturfaglege registreringane utarbeider Statsforvaltaren forslag til avgrensing av verneområdet. På grunnlag av tilbod og mal for verneforskrift for naturreservat utarbeider Statsforvaltaren forslag til verneforskrift som blir sendt til grunneigarane for kommentarar. Miljødirektoratet utpeikar ein skogsakkyndig som får i mandat å forhandle med grunneigarane eller grunneigarane sin representant. Ved semje blir det utarbeidd avtale der erstatningssum, forslag til verneforskrift og avgrensing av verneområdet blir avklart.

Det vanlege er at når staten og grunneigar er einige om desse punkta vil området gjennomgå vanleg sakshandsaming i tråd med naturmangfoldloven. Etter avtale med grunneigar kan melding og høyring av verneforslag likevel gjennomførast før avtale er signert. Frå avtaletidspunkt og fram til vernevedtak gjeld ei vederlagsordning. Utbetaling av erstatningsbeløp skjer når vernevedtaket er fatta.

3. Heimelsgrunnlag

Vern av spesielle område eller førekomstar skjer i medhald av lov 16. juni 2009 om forvaltning av naturens mangfold (naturmangfoldloven) jf. §§ 33 – 51. I naturmangfoldloven er det gitt heimel for oppretting av ulike vernekategoriar. Vernekategorien naturreservat, som er det strengaste vernet etter naturmangfoldloven, jf. § 37, vil bli bruka for denne verneplanen for skog på privat grunn.

Vedtak om oppretting av naturreservat vert gjort av Kongen i statsråd etter § 37 i naturmangfoldloven, som lyder slik:

- ” Som naturreservat kan vernes områder som
- a) inneholder truet, sjelden eller sårbar natur,
 - b) representerer en bestemt type natur,

- c) på annen måte har særlig betydning for biologisk mangfold,
- d) utgjør en spesiell geologisk forekomst eller
- e) har særskilt naturvitenskapelig verdi.

Som naturreservat kan også vernes et område som er egnet til ved fri utvikling eller aktive gjenopprettingstiltak å få verneverdier som nevnt i første ledd.

I et naturreservat må ingen foreta noe som forringer verneverdiene angitt i verneformålet. Et naturreservat kan totalfredes mot all virksomhet, tiltak og ferdsel. I forskriften kan det gis bestemmelser om vern av kulturminner i reservatet.

Treffes vedtak om reservat som krever aktive gjenopprettingstiltak, eller vedtak om reservat der bruk er en forutsetning for bevaring av det biologiske mangfold, skal det samtidig med vernevedtaket legges fram et utkast til plan for skjøtsel for å sikre verneformålet. Planen kan omfatte avtale om bruk av arealer, enkeltelementer og driftsformer. Planen eller avtalen kan inneholde bestemmelser om økonomisk kompensasjon til private som bidrar til områdets skjøtsel.”

4. Saksgang

MELDINGSFASEN

Formell start på verneplanarbeidet for Heddedalane utvidelse vart meldt 11. juni 2020. Det kom følgjande merknader i meldingsfasen:

Riksantikvaren (e-post av 12.06.2020) syner til kulturminneforvaltninga i fylkeskommunen og handsamar difor ikkje saka.

Språkrådet (brev av 29.06.2020) uttalar følgjande om navnet Heddedalane:

«Dette seternamnet er registrert i SSR med dei godkjente skrivemåtane Heddedalen (tilrådd) og Haddedalane. Naturreservatnamnet er ikkje registrert i SSR. Heradsregisteret har registrert uttalen /hɛˈddɑːlannə/. Setra som ber namnet ligg utanfor verneområdet, og Fylkesmannen bør difor vurdere å finne eit meir dekkande namn på dette naturreservatet. Dersom Fylkesmannen held på namnet som er nytta i dag, må det reisast formell namnesak for å få avklart skrivemåten».

Bane NOR (brev av 09.07.2020) uttalar at planområdet ikkje rører ved jernbanen sine interesser, og dei har difor ingen merknader til planarbeidet.

Statnett (brev av 13.06.2020) har ikkje kommentarar til verneplanarbeidet i dette området.

Landbruksdirektoratet (brev av 17.07.2020) uttalar følgjande:

«Som instans for høyringa av forslag til oppretting av nye naturreservat, ønsker vi å gi nokre generelle innspel til verneprosessen.

Grundig beskriving av området

Av høyringsdokumenta må det komme tydeleg fram om og i tilfelle korleis det aktuelle området blir nytta til landbruksformål. Dersom det er landbruksinteresser i området som ikkje blir tatt omsyn til i utkast til forskrift, ber vi om at det blir grunngjeve i høyringsdokumenta. Typiske landbruksinteresser kan vere (lista er ikkje uttømmende):
o Skogsbilveg som er naudsynt for skogbruk på tilgrensande areal
o Traktorveg i samband med jordbruk

- o Støl/seterområde*
- o Beite*
- o Reindrift*

Utforming av forskrift

Dersom det går vegar/ferdselsårer gjennom verneområdet, må Fylkesmannen vurdere om det kan bli gitt føresegn om merking, rydding og vedlikehald av desse. Det bør bli lagt til rette for drift og vedlikehald av eventuelle støl-/seterområde og bli opna for andre tekniske tiltak som bidreg til ein landbruksmessig utnytting av området. Dersom slike tiltak ikkje er ønskeleg innanfor verneområdet, må det bli gitt ei fagleg grunngjeving for dette i høyringsdokumenta.

Beite vil vere aktuelt i mange område som blir foreslått verna som naturreservat. Det bør difor bli vurdert om forskrifta kan opne for dette. Viss ikkje, må det bli gjort greie for kvifor i høyringsdokumenta. Dersom det blir opna for beiting i området bør det også bli utarbeida føresegn for utsetting av saltsteinar og oppføring/vedlikehald av gjerde og sankekveer.

For alle tiltaka over må det bli vurdert om det kan bli gitt føresegn om motorferdsel i samband med tiltaka. Det bør bli gitt generelt unntak frå føresegna om ferdsel i samband med uttransportering av sjuke og skadde bufe.

Vi går ut frå at Fylkesmannen sin landbruks- og reindrifsfaglige kompetanse blir involvert i utforming av forskrift og verneplan. Det vil også vere nyttig å involvere den lokale landbruksforvaltninga i arbeidet.»

NVE (brev av 22.07.2020) uttalar at det ikkje er nokon konflikt med kraftliner i området og uttalar elles følgjande:

«NVE har generelt ikke kjennskap til nettselskapenes planer for distribusjonsnett, og vi forutsetter at områdekonsesjonærene kommenterer eventuelle konflikter med egne anlegg og planer. Etter det vi kan se er ikke områdekonsesjonærene Vest-Telemark kraftlag AS og Midt-Telemark Energi AS med på høringslisten, og vi ber om at de får anledning til å uttale seg.»

NJFF Telemark (brev av 22.07.2020) uttalar følgjande:

«Så lenge de fremtidige verneforskriftene for områdene ivaretar NJFF Telemark sine interesser, på linje med tidligere verneforskrifter, har vi ingen innvendinger mot oppstart av verneprosessene.»

Direktoratet for mineralforvaltning (brev av 22.07.2020) uttalar følgjande:

«For verneområda Miland, Myklestul, Lynglifjellet (Ånevatn), Korseikåsen, Skitnebuffjellet, Muttjønn, Bolkesjø, Barlinddalen og Heddedalane naturreservat kan vi ikkje sjå at den føreslegne planen kan få følgjer for registrerte førekomstar av mineralske ressursar, bergrettar eller masseuttak i drift. Vi har difor ingen merknadar til varsla verneplanarbeid for desse områda.»

STATSFORVALTAREN SINE KOMMENTARER TIL DEI INNKOMNE MERKNADENE

Språkrådet foreslår endra namn på naturreservatet.

Når det gjeld innspelet frå Landbruksdirektoratet, så vil vi kommentere at området som er planlagt verna ikkje har støl/seterområde, men skulle det vera aktuelt med beitedyr er det tatt høgde for det i verneforskrifta, jf. § 4b og g, § 6a, 7c, f og i.

Når det gjeld innspelet frå NVE så vil vi ta inn Vest-Telemark kraftlag AS og Midt-Telemark Energi AS på høyringslista.

VIDARE SAKSHANDSAMING

Verneforslaget med nærare omtale av området, kart over verneområdet og forslag til verneforskrift vert no sendt på ei felles sentral og lokal høyring med frist **14. april 2021**. Føremålet med høyringa er å få fram opplysningar om interesser som kan bli råka av forslaget til vern.

Etter høyringa vil Statsforvaltaren kommentere eventuelle uttaler og utarbeide ein tilråding om vern til Miljødirektoratet. Direktoratet vil så lage innstilling til Klima- og miljødepartementet (KLD) og vedtak om freding vert gjort ved kgl. res. av Kongen i statsråd.

5. Verneplanen sitt omfang

Navn	Kommune	Gnr./bnr.	Tal på grunneigarar	Areal i daa anslag	Verneverdi
Heddedalane naturreservat	Tokke	13/3, 13/4, 19/3, 19/4, 19/19, 19/27, 19/29 og 22/3 .	5	2822	Nasjonal (***)

*Gnr./bnr. 22/3 er utvidingsarealet, resten er eksisterande naturreservat.

6. Faktaark for utvidingsområdet

LOKALITET: **Heddedalane/Ivarflaten**
KOMMUNE: **Tokke**
FYLKE: **Vestfold og Telemark**
VERNEKATEGORI: **Naturreservat**
AREAL: **1033**
HØGDE OVER HAVET: **80- 720.m o.h.**
AKTUELLE EIEGDOMAR: **Gnr./bnr. 22/3**

OMRÅDESKILDRING

Lokaliteten omfattar dei bratte sørvendte lisidene ved Ivarflaten vest for Heddedalane naturreservat, langs Bandak mellom Dalen og Lårdal i Tokke kommune. Området omfattar bratte, sørvendte lisider, renner og stup, iblanda slakere hyller og løsmasseparti og ligg i boreonemoral og sørboreal sone.

Berggrunnen i området består av omdanna sandstein og kvartsskifer med innslag av konglomerat enkelte plassar i lia. Grunnlendte areal dominerer dei bratte partia. Nedst i lia er det vekselvis grov blokkmark og finkorna skredjord, med størst mektighet av løsmasser på dei flate partia ved Ivarflaten i søraust.

VEGETASJON, SKOGSTRUKTUR OG PÅVERKNAD

Lia har dominans av eldre varmekjære skogtypar i mosaikk med svært urterike opne og grunnlendte bergsva. Det er lindedominert edellauvskog i dei nedre delar av lisida. Edellauvskogen har varierende rikhet med overgangar mellom rasmarkprega lågurtskog og kalklågurtskog. Lisidene lenger opp er prega av ein småskala mosaikk av intermediære til rike vegetasjonstypar på grunnlendt mark. Mest dominerande er kalkfurskog av typen sesongfuktig kalkfurskog i mosaikk med fattigare svak lyng/bærlyng- lågurtskog. På opne bergsva og små grunne hyller i skogen inngår også mykje areal med intermediær til kalkrik open grunnlendt lyng/lavmark, stedvis nesten engprega.

Eldre skog dominerar området som heilhet. Furskogen er eldst, men det finst og ein god del eldre edellauvtrær. Lia har sprede dødvedelement av alle førekommande treslag, lokalt med større førekomstar av læger og gadd. Mest av ferske nedbrytingsstadier, men alle stadier er representert og gir ein svak dødvedkontinuitet.

Området har først og fremst ein rik karplanteflora av kalkkrevande og varmekjære artar knytta både til edellauvskogen og til den tørrare kalkfurskogen og opne grunnlendte bergsva. Artsmessig kan ein kalkrik karplanteflora fremhevast. Sett i eit større kalkskogperspektiv er dei sørvendte lisidene mot Bandak og vidare inn i Dalen, saman med dei sørvendte lisidene i Hjartdal, dei mest kalkrike vi har på grunnfjellet i Telemark. Kombinasjonen med eit gunstig lokalklima gjer dei også til spesielt artsrike, spesielt for varme- og kalkkrevande karplantar, insekt og truleg òg til ei viss grad for sopp.

VERNEINTERESSER

I dette avsnittet er mellom anna såkalla «raudlista» artar omtala. Det er artar som er sjeldne og som er gjevne ulik status etter kor stor fare det er for utrydding. Status er henta frå Raudlista 2015 frå Artsdatabanken. EN = sterkt truga, VU = sårbar, NT = nær truga, der «sterkt truga» er mest truga og «sårbar» er meir sjeldan enn «nær truga».

Av røddlista naturtypar er lågurt – lyngfurskog (NR) vanleg, samt partiar med forekomst av lågurt-lyngkalkskog (NT) og kalklindeskog (VU) i partiar. Det er også flekkvis innslag av open grunnlendt kalkmark i boreonemoral sone (VU).

Av raudlista artar er det funn av stjernetistel *Carlina vulgaris* (NT), hvit skogfrue *Cephalanthera longiflora* (NT), ask *Fraxinus excelsior* (VU), barlind *Taxus baccata* (VU), alm *Ulmus glabra* (VU), skrukkeøre *Auricularia mesenterica* (NT), rosenkjuke *Fomitopsis rosea* (NT), nordlig aniskjuke *Haploporus odoratus* (VU), almekullssopp *Hypoxylon vogesiacum* (NT) og rynkeskinn *Phlebia centrifuga* (NT).

Edellauvskogområdene i dei nedre delane har ein rik karplanteflora av basekrevande artar som asal- artar, taggbregne, junkerbregne, flakbregne, tannrot, vårerteknapp, myske, fuglereide, vårmarihand og lundgrønnaks. I kalkfurskogen og i opne grunnlendte parti veks artar som dvergmispel, flekkgrisøre, bergmynte, bakkemynte, breiflangre, rødflangre, kattedot og bergperikum. På engprega hyller oppe i lia finst marinøkkel. Det er i partiar relativt mykje lav og mose på lauvtrær og stein med artar som filthinnelav, blyhinnelav, sølvnever, lungenever, stiftfiltlav, almeteppepose og kalkraggmose. På død ved finst bl.a. rauslistearter som nemt over. Hvittryggspett har tilhold i området.

Området gis ein klar nasjonal verdi med 5 poeng, og er vurdert som nasjonalt verneverdig (***). Det grensar i sørøst mot verneområdet *Heddedalane naturreservat* som blei verna i 1993. Samanslåing av desse områda vil gje eit område med totalareal på 2822 daa.

Området oppnår høg mangeloppfylling av kalkbarskog, rik edellauvskog og raudlista naturtypar som har udekt vernebehov i fylket (Framstad et al. 2017). Videre inngår dei generelle manglane høge bonitetar og lavlandsskog. Området ligg i boreonemoral og sørboreal sone og bidreg til eit større samanhengande skogvernområde.

FØREMÅL

Føremålet med naturreservatet er å ta vare på ein sjeldan og spesiell skogtype, med ein mosaikk av rik edellauvskog og rik barskog. Floraen er uvanleg artsrik og med mange kalkkrevande artar.

Området har særskilt naturvitskapeleg verdi på grunn av kalkrik berggrunn og førekomstar av sjeldne og truga artar og naturtypar

ANDRE INTERESSER

Ikkje kjent.

TEKNISKE INNGREP

Ikkje kjent.

PLANSTATUS

Arealet er sett av til LNF-område i kommuneplanen sin arealdel.

MERKNADER

Det er ikkje behov for skjøtsel av artsmangfold og naturtypar.

SKOGBRUKSOPPLYSNINGAR

Tabellen under viser skogdata frå det føreslegne utvidingsområdet.

Navn	Total-areal daa	Produktivt areal i daa anslag				Annet areal i daa anslag		Tilvekst m ³ /daa	Volum m ³
		H	M	L	Sum	Myr	Annet		
Heddedalane utvidelse	1033	66	76	806	948	2	87	0,15	6587

(Data er levert av AT Skog)

LITTERATUR

Referanse: *Brynjulvsrud J. G. 2016. Naturverdier for lokalitet Ivarflaten, registrert i forbindelse med prosjekt Kalkskog Telemark 2015. NARIN faktaark. BioFokus.*

http://lager.biofokus.no/omraadebeskrivelser/KalkskogTelemark2015_Ivarflaten.pdf

7. Forslag til verneforskrift

KOMMENTARAR TIL NOKRE AV FØRESEGNENE

Bruk av naturreservatet til større arrangement er forbode.

Definisjon på større arrangement er omlag 30 deltakarar. Er det fleire deltakarar må det søkjast om løyve, og då kan forvaltningsstyresmakta vurdere dette i høve til § 7 pkt. d.

Vedlikehald av bygningar, vegar og andre anlegg og innretningar i høve til tilstand på vernetidspunktet

Aktuelle bygningar, vegar og andre installasjonar som finst på vernetidspunktet blir vanlegvis teikna inn vernekartet og desse kan vedlikehaldas i høve til tilstand på vernetidspunktet. Av kjente anlegg og innretningar innafor utvidinga, er det anlagt ein sti øvst i lia.

Motorferdsel

Motorferdsel er forbode etter § 5 pkt. a. Det er nokre generelle unntak i § 6 og det kan gjevast dispensasjon etter søknad etter reglane i § 7. I tillegg gjeld lov om motorferdsel i utmark, det vil seia at kommunen og grunneigar må gje løyve til motorferdsel på vanleg måte.

Merking, rydding og vedlikehald av eksisterande stigar, løyper og gamle ferdselsvegar

Vegar og stiar kan haldast ved like, ryddes, merkes og kan haldast open for turgåing, sykling og hesteridning. Ridning med vogn er ikkje tillat på sti. Enkel rydding av kvist og fjerning av greiner og nedfall i vegar og stiar som hindrar ferdselen, kan gjerast utan søknad til Statsforaltaren. Vindfall som måtte bli liggande over veg og stig kan kappast og legges til side, normalt vil dette bli gjort av grunneigar eller Statens naturoppsyn.

Beiting og gjerding

Beiting er tillatt etter forskrifta. Framtidig behov for oppsetting av gjerde innafor området er søknadspiktig etter forskrifta. Det er ikkje oss kjent beitedyr i området i dag eller satt opp gjerde for dette.

Vernekart

Eksisterande sti er markert i forslaget til vernekart. Eventuelle manglande anlegg og innretningar i kartet kan leggjast inn i samråd med grunneigar, før tilråding til Miljødirektoratet.

Vedlegg 1

Forslag til ny forskrift om vern av Heddedalane naturreservat i Tokke kommune i Vestfold og Telemark fylke

§ 1.(føremål)

Føremålet med naturreservatet er å ta vare på ein sjeldan og spesiell skogtype, med ein mosaikk av rik edellauvskog og rik barskog. Floraen er uvanleg artsrik og med mange kalkkrevande artar.

Området har særskilt naturvitskapeleg verdi på grunn av kalkrik berggrunn og førekomstar av sjeldne og truga artar og naturtypar.

Det er ei målsetjing å behalde verneverdiane i mest mogleg urørd tilstand, og eventuelt vidareutvikle dei.

§ 2.(geografisk avgrensing)

Naturreservatet omfattar følgjande gnr./bnr.: Tokke: 13/3, 13/4, 19/3, 19/4, 19/19, 19/27, 19/29 og 22/3.

Naturreservatet dekkjer eit totalareal på 2822 dekar. Grensene for naturreservatet går fram av kart datert Klima- og miljødepartementet Dei nøyaktige grensene for naturreservatet skal merkast av i marka. Knekkpunkta skal koordinatfestast.

Verneforskrifta med kart vert oppbevart i Tokke kommune, hos Statsforvaltaren i Vestfold og Telemark, i Miljødirektoratet og i Klima- og miljødepartementet.

§ 3.(vernereglar)

I naturreservatet må ingen gjera noko som vil skade verneverdiane som er nemnde i føremålet med vernet.

I naturreservatet gjeld følgjande vernereglar:

- a) Vegetasjonen, medrekna daude buskar og tre, er verna mot skade og øydelegging. Det er forbode å fjerne planter og sopp (medrekna lav) eller delar av desse frå naturreservatet. Planting eller såing av tre og annan vegetasjon er forbode.
- b) Dyrelivet, medrekna reirplassar og hiområde, er verna mot skade, øydelegging og unødig forstyrring. Utsetting av dyr er forbode.
- c) Området er verna mot alle tiltak som kan endre naturmiljøet, som til dømes oppføring av bygningar, anlegg, gjerde og andre varige eller mellombelse innretningar, parkering av campingvogner, brakker o.l., opplag av båtar, framføring av luftleidningar, jordkablar, kloakkleidningar, bygging av vegar, drenering eller anna form for tørrlegging, uttak, oppfylling eller lagring av masse, utføring av kloakk eller anna konsentrert forureining, dumping av avfall, gjødsling, kalking eller bruk av kjemiske plantevern- eller skadedyrmiddel. Forsøpling er forbode. Opplistinga av tiltak er ikkje uttømande.
- d) Bruk av naturreservatet til større arrangement er forbode.

§ 4.(generelle unntak frå vernereglane)

Vernereglane i § 3 andre ledd er ikkje til hinder for:

- a) Sanking av bær og matsopp.

- b) Beiting.
- c) Jakt, fangst og fiske i samsvar med gjeldande lovverk.
- d) Oppsetting av mellombelse, mobile jakttårn for storviltjakt.
- e) Felling av store rovdyr i samsvar med gjeldande lovverk.
- f) Vedlikehald av bygningar og andre anlegg og innretningar i samsvar med tilstanden på vernetidspunktet.
- g) Forsiktig rydding av småbuskar og kvist på postar i samband med jakt på storvilt.
- h) Utsetjing av saltstein.
- i) Brenning av bål med tørrkvist eller ved ein har med seg, i samsvar med gjeldande lovverk.
- j) Vedlikehald av stigar avmerka på vernekartet, i samsvar med tilstanden på vernetidspunktet.

§ 5.(regulering av ferdsel)

All ferdsel skal skje varsamt og taka omsyn til vegetasjon, dyreliv og kulturminne.

I naturreservatet gjeld følgjande reglar om ferdsel:

- a) Motorisert ferdsel på land og i vatn er forbode, medrekna landing og start med luftfartøy.
- b) Sykling, riding og bruk av hest er forbode, utanom eksisterande stigar.

§ 6.(generelle unntak frå reglane om ferdsel)

Ferdselsreglane i § 5 er ikkje til hinder for gjennomføring av militær operativ verksemd og tiltak i samband med ambulanse-, politi-, brannvern-, rednings- og oppsynsverksemd, og gjennomføring av skjøtsels- og forvaltningsoppgåver som er fastsett av forvaltningsstyresmakta. Unntaket gjeld ikkje for øvingsverksemd.

Ferdselsreglane i § 5 andre ledd er ikkje til hinder for:

- a) Naudsynt motorferdsel i samband med uttransport av sjuke og skadde bufe. Kjøretøy som nyttast skal vere skånsame mot markoverflata. Det skal gjevast melding til ansvarleg oppsyn for verneområdet før transporten tek til.
- b) Naudsynt uttransport av felt elg og hjort med lett beltekjøretøy som ikkje set varige spor i terrenget.
- c) Landing og start med Forsvaret sine luftfartøy.

§ 7.(spesifiserte dispensasjonsreglar)

Forvaltningsstyresmakta kan etter søknad gi dispensasjon til:

- a) Tiltak i samband med forvaltning av vilt og fisk.
- b) Merking av eksisterande stigar og gamle ferdselsveggar.
- c) Istandsetting, vedlikehald og skjøtsel av kulturminne.
- d) Avgrensa bruk av naturreservatet for aktivitetar som nemnde i § 3 d.
- e) Oppsetting og vedlikehald av gjerder.
- f) Øvingskøyning for formål nemnt i § 6 første ledd.
- g) Uttransport av felt elg og hjort med anna kjøretøy enn lett beltekjøretøy som nemnt i § 6 andre ledd b.
- h) Gjenoppføring av bygningar merka på vernekartet etter brann eller naturskade.
- i) Hogst av lauvved til hytte på gbnr. 19/4, markert i vernekartet.
- j) Avgrensa bruk av reservatet i undervisningssamanheng.
- k) Naudsynt motorferdsel i samband med aktivitetar etter § 4 f, j og § 7 c, e og h.

§ 8.(generelle dispensasjonsreglar)

Forvaltingsstyresmakta kan gjere unntak frå forskrifta dersom det ikkje strid mot formålet med vernet og ikkje kan påverke verneverdiane nemneverdig, eller dersom omsyn til tryggleik eller til vesentlege samfunnsinteresser gjer det naudsynt, jf. naturmangfoldloven § 48.

§ 9.(skjøtsel)

Forvaltingsstyresmakta, eller den forvaltingsstyresmakta fastset, kan setje i verk tiltak for å oppretthalde eller oppnå den natur- eller kulturtilstanden som er formålet med vernet, jf. naturmangfoldloven § 47.

§ 10.(forvaltingsplan)

Det kan utarbeidast forvaltingsplan med nærare retningsliner for forvaltning av naturreservatet. Forvaltingsplanen kan innehalde nærare retningsliner for gjennomføring av skjøtsel.

§ 11.(forvaltingsstyresmakt)

Miljødirektoratet fastset kven som skal vere forvaltingsstyresmakt etter denne forskrifta.

§ 12.(ikraftsetjing)

Denne forskrifta tek til å gjelde straks. Samtidig opphørar forskrift av 9.7.1993 nr. 7 om vern av Heddedalane naturreservat, Tokke kommune, Telemark med tilhørande vernekart.

Vernekart fylgjer med som eige vedlegg.